



KEMENTERIAN KERJA RAYA

KENYATAAN MEDIA

MALAYSIA SERTAI INTERTRAFFIC AMSTERDAM 2026 BUAT KALI PERTAMA, PERKUKUH KERJASAMA MOBILITI PINTAR GLOBAL

AMSTERDAM – Malaysia mencatat satu lagi pencapaian di pentas antarabangsa apabila menyertai Intertraffic Amsterdam 2026 buat kali pertama, sekali gus menjadi satu-satunya negara ASEAN yang menerima jemputan rasmi untuk mengambil bahagian dalam forum global berprestij mengenai teknologi trafik, infrastruktur jalan raya dan mobiliti pintar.

2. Penyertaan Malaysia di program yang berlangsung di RAI Amsterdam dari 9 hingga 12 Mac 2026 ini diketuai oleh Menteri Kerja Raya, Dato Sri Alexander Nanta Linggi, yang turut dijemput sebagai ahli panel dalam sesi sidang kemuncak program berkenaan.

3. Delegasi Malaysia turut disertai oleh Ketua Pengarah Kerja Raya, Dato' Sri Ir. Roslan Ismail dan Encik Ir Mohd Hadzmir Yusoff Ketua Pengarah Lembaga Lebuhraya Malaysia (LLM).

4. Menurut Dato Sri Alexander Nanta Linggi, penyertaan sulung Malaysia dalam Intertraffic Amsterdam merupakan satu pengiktirafan penting terhadap usaha negara dalam memperkukuh pembangunan sistem mobiliti pintar serta pengurusan infrastruktur jalan raya yang lebih cekap dan berdaya tahan.

5. “Platform ini memberi peluang kepada Malaysia untuk meninjau perkembangan terkini dalam teknologi pengurusan trafik, keselamatan jalan raya serta pelaksanaan Intelligent Transport Systems (ITS). Pada masa yang sama, ia membuka ruang kepada kerjasama strategik dengan rakan antarabangsa bagi memperkukuh keupayaan negara dalam pembangunan mobiliti pintar,” katanya.

6. Beliau menambah bahawa usaha memperkukuh pembangunan infrastruktur pintar dan sistem mobiliti yang lebih cekap ini selari dengan aspirasi kerangka blueprint ITS 2025 - 2030 Malaysia dan Kerangka Malaysia MADANI, yang menekankan

pembangunan negara secara mampan, berinovasi serta memberi manfaat kepada kesejahteraan rakyat.

7. Intertraffic Amsterdam merupakan acara dwitahunan yang dianjurkan sejak tahun 1972 dan diiktiraf sebagai antara platform global paling berpengaruh dalam bidang pengurusan trafik dan infrastruktur jalan raya. Edisi tahun ini dijangka menghimpunkan ribuan delegasi industri, pembuat dasar serta penyedia teknologi dari lebih 100 negara, sekali gus menjadikannya antara platform penting bagi perkongsian pengetahuan dan inovasi dalam sektor mobiliti pintar global.

9. Sepanjang program ini, beberapa organisasi dan rangkaian ITS antarabangsa turut menyatakan minat untuk mengadakan pertemuan dua hala bersama Malaysia bagi meneroka peluang kerjasama dalam bidang teknologi mobiliti pintar, perkongsian kepakaran serta pembangunan sistem pengangkutan yang lebih selamat dan cekap.

9. Penglibatan Malaysia di Intertraffic Amsterdam juga melengkapi usaha Kementerian Kerja Raya dalam memperkukuh ekosistem inovasi dan perkongsian ilmu di peringkat domestik melalui kerjasama strategik dalam penganjuran Ekspo Teknologi Jalan dan Trafik MY-ASEAN (MyARTTE) serta Konvensyen Penyelenggaraan Jalan Malaysia (MRMC).

10. Kedua-dua platform ini berperanan sebagai medium strategik untuk menterjemahkan perkembangan teknologi dan amalan terbaik antarabangsa kepada pelaksanaan yang lebih praktikal dalam pengurusan trafik dan penyelenggaraan infrastruktur jalan raya negara.

11. Melalui pendekatan ini, Malaysia turut berpotensi memainkan peranan yang lebih aktif sebagai antara rujukan pembangunan sistem mobiliti pintar di rantau ASEAN, selari dengan usaha memperkukuh kerjasama serantau serta mempercepatkan agenda transformasi infrastruktur negara.



K E M E N T E R I A N K E R J A R A Y A

KENYATAAN MEDIA

12. Penyertaan ini mencerminkan komitmen Kementerian Kerja Raya untuk terus memperkukuh jaringan kerjasama global serta menyokong agenda transformasi sistem pengangkutan dan infrastruktur negara yang lebih moden, berdaya tahan dan berteraskan teknologi demi manfaat rakyat.

#Tamat#

KEMENTERIAN KERJA RAYA
10 MAC 2026

#KearahKesejahteraanRakyat
#JasaKepadaRakyat
#MYJALAN
#TangkasBertindak
#KerajaanMADANI
#MADANIbekerja